

1920Թ. ԹՈՒՐԲ-ՀԱՅԿԱԿԱՆ ՊԱՏԵՐԱԶՄԻ ՀԻՄՆԱԽՆԳԻՐՆԵՐԸ ՀԱՅ
ՊԱՏՄԱԳՐՈՒԹՅԱՆ ՄԵՁ

Ս.Մ.ՔԱՌՅԱՆ

1920Թ. աշնան թուրք-հայկական պատերազմը հայ ժողովրդի պատմութեան նորագույն շրջանի ողբերգական փուլերից է: Անկասկած, 1915Թ. Մեծ Եղեռնից հետո տեղի ունեցած այս նոր արհաւիրքը հայ ժողովրդից խլեց հազարավոր զոհեր, պատճառեց ահռելի նյութական վնասներ, և ամենակարևորը՝ դրա հետևանքով անկում ապրեց Հայաստանի անկախ պետականութիւնը:


Առաջին հայացքից պատերազմի սկսվելը և հատկապես նրա արդյունքը տարակուսելի էին: Փաստորեն, Առաջին աշխարհամարտում կրած խայտառակ պարտութիւնից հետո, թվում էր, որ Օսմանյան կայսրութիւնն անվերադարձ փլուզվել էր: Այս ամենից զատ, Անտանտի տերութիւնների հաղթական արշավը և նորահռչակ Հայաստանի միացումն այդ բլուրին իրական հույսեր էր ներշնչում արևմտահայ նահանգների ազատագրման և հայկական պետականութեան սահմանային ընդլայնման ուղղութիւնով: Սակայն, երբ եկավ հայ ժողովրդի համար օրհասական այդ պահը՝ նույնիսկ Հանրապետութեան ղեկավարութեան համար անսպասելի ձևով, նրա նախկին դաշնակիցները և հովանավորները խոսքերը մեկ արած երես թեքեցին և իրենց հույսին ապաստանած «փոքր դաշնակից» Հայաստանին քեմալական հորդանների դեմ բախտի քմահաճուքին ձգեցին:

Քեմալական շարժման ծավալումը, Արևմուտքի քմահաճուքի, հաշվենկատ վերաբերմունքը, Ռուսաստանի որոշակի աջակցութիւնը թուրքերին, Վրաստանի անհոգի «չեզոքութիւնը» և Հայաստանի Հանրապետութեան ներպետական ու բարոյահոգեբանական անառողջ մթնոլորտն ու պատերազմին անպատրաստ, «հանգստացած» կեցվածքը հանգեցրեցին 1918Թ. մայիսյան հերոսամարտերով նվաճված պետականութեան կորստին:

Եթե բնորոշելու լինենք հարցի վերաբերյալ մինչև 1980-ական թվականները կատարված աշխատանքները, ապա դրանցում հարցին անդրադարձել են որպես կանոն մակերեսորեն: Հարցի պատմութիւնն ուսումնասիրողները գերազանցապես խնդրին մոտեցել են կուսակցական-դասակարգային դիրքերից և հաճախ կողմնապահ դիրքորոշում ցուցաբերել: Դրա հետևանքով, չնայած այս պատերազմի մասին պատմագիտական և հուշագրական որոշակի գրականութեան պոլիթիանը, այն ճշգրիտ, ամփոփ գնահատման գրեթե չի արժանացել:

Նախ և առաջ անդրադառնանք քեմալական շարժման գնահատման հարցերին: Այդ մասին մասին ուշագրավ և հետաքրքիր աղբյուրներից են Մեվլան Զադե Րիֆաթի հուշերը:¹ Նա հիմնավոր ապացուցում է, որ քեմալական շարժումը ծրագրվել ու նախապատրաստվել էր սուլթանական կառավարութեան կողմից և հետապնդում էր միայն մեկ նպատակ՝ արգելել Օսմանյան

¹ Մեվլան Զադե Րիֆաթ, Օսմանյան հեղափոխութեան մութ ծալքերը և իթիհաթի հայաշինը ծրագրերը, Պեյրութ, 1968 և վերահրատարակութիւնը՝ Ե., 1991:



կայսրությունների արևելյան նահանգներում հայկական անկախ պետություն ստեղծմանը:

Հայաստանի նկատմամբ պանթուրքական նվաճողական քաղաքականությունը դրսևորման ուղղակի վկայություններ կան Մուստաֆա Քեմալի հուշերում և ելույթներում, որտեղ պարունակված ուշագրավ նյութերն ուղղակի ապացուցում են ինչպես քեմալական շարժման ռեակցիոն բնույթը, այնպես էլ 1920թ. Հայ-թուրքական պատերազմի ժամանակ թուրքերի հրավի նվաճողական նկրտումները:²

Ինչ խոսք, քեմալական շարժումն ուներ երկակի՝ մի կողմից օտար տիրապետության դեմ պայքարի արդարացի բնույթ, և մյուս կողմից՝ ոչ թուրք ժողովուրդների պատմական իրավունքների ըստ ամենայնի ճնշման և թուրքական ամբողջատիրություն պահպանման ձգտում: Քեմալականները ծայրահեղորեն դեմ էին ոչ թուրքերի ազգային ինքնորոշմանը: Անհրաժեշտ է նշել, որ խորհրդային առանձին թուրքամետ պատմաբաններ քեմալական թուրքիայի մասին խոսելիս մեղանշում են պատմական ճշմարտության դեմ՝ քեմալական շարժումը բնորոշելով միմիայն սոսկ որպես հակաիմպերիալիստական շարժում:³

Մինչդեռ, ժամանակին Վ. Լենինը քեմալական շարժման մեջ տեսնում էր նաև մեկ այլ կողմ՝ նրա զավթողական ձգտումները Հայաստանի և Անդրկովկասի նկատմամբ, Ռուսաստանի հանդեպ քեմալականների երկդիմի, երկերեսանի քաղաքականությունը:⁴

Հայ հեղինակները, իրավացիորեն ընդգծելով քեմալական շարժման պայքարը արևմտյան իմպերիալիզմի դեմ, որը պաշտպանվում էր խորհրդային Ռուսաստանի կողմից, միաժամանակ ցույց են տալիս նրա՝ Հայ և մյուս ոչ թուրք ժողովուրդների ազատագրական շարժման ճնշման, Հայաստանի հանդեպ նրանց նվաճողական ծրագրերը:⁵

Քեմալական շարժման լավագույն գնահատականներից մեկը տրվել է և հիմնավորապես ներկայացվել ու վերլուծվել Գ. Ղարիբջանյանի և Ե. Սարգսյանի կողմից:⁶ Նրանք իրենց տեսակետները հիմնավորում և խորհրդային պատմագիտության մեջ առկա սխալ դիրքորոշումը քննադատում են Վ. Լենինից կատարված մեջբերումներով: Այսպես, Վ. Լենինը, բնութագրելով թուրքիայի իշխողների դասակարգային էությունը, նշում էր. «Թուրքիայի վերնախավում կանգնած են կադետները, օկտյաբրիստները, ազգայնականները, որոնք պատ-

² М. Кемаль, *Путь новой Турции*, т. 1-4, М., 1930-1934. Кемаль Ататюрк, *Избранные речи и выступления*, М., 1996.

³ Տե՛ս, օրինակ, *Всемирная история*, т. 8, М., 1961, с. 452-454 (հեղինակ՝ Ա. Միլլեր):

⁴ Ленинский сборник, М., 1959, с. 131.

⁵ Տե՛ս, օրինակ՝ Բ. Խաչատրյան, *Кто такие кемалисты?*, (Коммунист, 1952, N 117), Ա. Ն. Մնացականյան, *Ռևոլյուցիան Անդրկովկասում և Ռուսաստանի պատվիրակները*, Ե., 1961, էջ 128-139; Ե. Սարգսյան, *Թուրքիան և նրա նվաճողական քաղաքականությունը Անդրկովկասում*, Ե., 1964, էջ 438, Գ. Ա. Գալոյան, *Рабочее движение и национальный вопрос в Закавказье*, Е., 1969, с. 388.

⁶ Գ. Բ. Գարիբձեղյան, Ե. Կ. Տարգիսյան, *К вопросу о характере национально-освободительной войны в Турции в 1919-1922 гг.* ВАА, 1982, N 3, с. 160-173.

րաստ են մեղ հանձնել Անտանտին»:⁷ Նոր փաստերի և աղբյուրների հիման վրա նրանք ապացուցում են դեռ 1919թ. և 1920թ. սկզբին Հայաստանի վրա հարձակվելու Մ. Քեմալի ծրագրի գոյությունը:

1919-1920թթ. Հայ-թուրքական հարաբերությունների ուսումնասիրությունը բնագավառում զգալի ներդրում ունի Ե. Սարգսյանը, որի աշխատանքները՝ պատմագիտական խոր վերլուծություններ, նյութի բազմակողմանի իմացություններ, մնայուն տեղ ունեն նաև ընդհանուր թուրքագիտության ասպարեզում:⁸ Նա Ռ. Սահակյանի հետ տվել է 1918-1921թթ. Հայաստանի պատմության և Հայ-թուրքական հարաբերությունների վերաբերյալ թուրքական պատմագիտության՝ փաստերով հարուստ և կուռ տրամաբանություն վրա կառուցված, համակարգային քննադատություն:⁹

Պատմագիտական աշխատությունների վերլուծումից առաջ ներկայացնենք թեմայի վերաբերյալ հուշագրությունները:

Հանրապետության խնամատարությունների նախարար Արտաշես Բաբայանի հուշերը կարևոր են որպես ականատեսի վկայություններ:¹⁰ Նա առանձնապես մեղադրում է գլխավորական հրամանատարներին և որպես հայկական բանակի պարտություն պատճառներ նշում թուրքական վտանգի անտեսումը, և սեփական ուժերի գերազնահատումը, զորքի և բնակչության պարտվողական հոգեբանությունն ու առկա ներքին հակամարտությունը, բոլշևիկյան քայքայիչ քարոզչությունը և այլն: Նա դեմ է այն մտեցմանը, որ իբր բանակն ու ժողովուրդը չուզեցին կռվել և թերագնահատում է կռվելու տրամադրվածությունը բացակայության փաստը:

Սփյուռքահայ հեղինակներից Կարո Սասունին, քննելով հայկական բանակի պարտության պատճառները, նշում է թուրքական զորքի համեմատաբար լավ պատրաստվածությունը, կարգապահությունը, փորձառությունը, բարձր ոգին և նվիրվածությունը, հայկական հրամանատարության անպատասխանատու կեցվածքը և խուճապային տրամադրությունը, դաշնակիցների կողմից Հայերին լքելը, բոլշևիկների քարոզչությունը:¹¹

Կարևոր հուշագրական աղբյուր են Հայ Գնդունիի (Համբարձում թոփչյան) երկու հուշերը:¹² Ռազմական գործողությունների անմիջական մասնակիցն իրավացիորեն Կարսի անկումը համարում է «մեր նորագույն պատմության ամենէն ցնցող և ճակատագրական դէպքերէն մէկը», որի «պարզաբանությունն ու քննադատությունը՝ վերապրող հայութեան, իւր յառաջադեմ սերունդին ու մտավորականութեան գերագույն պարտականությունն

⁷ Коммунист, М., 1963, N 6, с. 8.

⁸ Տե՛ս օրինակ՝ Է. Կ. Саркисян, Великая Октябрьская социалистическая революция и национальная война в Турции, 1918-1922 гг., ВВА, 1967, N 3, с. 153-174.

⁹ Ե. Սարգսյան, Ռ. Սահակյան, Հայ ժողովրդի նոր շրջանի պատմության նենգափոխումը թուրք պատմագրության մեջ, Ե., 1963, սրա լրացումը՝ նույնի, Հանուն պատմական ճշմարտության (Երեկոյան Երևան, 9. VI. 1988); Է. Կ. Саркисян, Из истории Армении 1918-21 гг. в освещении турецких авторов (Литературная Армения, 1991, N 8 с. 91-103).

¹⁰ Ա. Բաբայան, Կարսի անկումը, Հայրենիք, Բոստոն, 1923, N 12:

¹¹ Կ. Սասունի, Հայ-թուրքական պատերազմը, Հայրենիք, Բոստոն, 1926, N 4-9, 11, Բեյրութ, 1969:

¹² Հայ Գնդունի, Դրուագներ Կարսի կռիւներէն (Պայքար, Բոստոն, IX. 1931, էջ 77-85), Կարսի անկման պատճառները (Մարտկոց, Փարիզ, 29.X - 10.XI. 1932):

է»:¹³ Նա իր հուշերում Կարսի անկման պատճառներին անդրադառնում է զուտ «ուսումնասիրական և մարտական» տեսակետներից, առանց քննելու հարցի քաղաքական և դիվանագիտական կողմերը՝ թեպետև դրանք չափազանց կարևոր համարելով: Հեղինակը նշում է հայկական բանակի պարտության մեկ տասնյակից ավելի պատճառներ, որոնք են՝ չկոպելու տրամադրվածությունը, բանակում տիրող անկարգապահությունը, բարոյահոգեբանական անկումային վիճակը, քաղաքացիական և զինվորական իշխանությունների համագործակցության բացակայությունը, հանրապետության ղեկավարության «նահանջական և պարտուղական հոգեբանությունը», կատարյալ անպատրաստվածությունը, հետախուզության բացակայությունը, սխալ ուսումնասիրությունը: Կարսի անկման մասին հուշերից հարկ է հիշատակել Գարեգին Հովսեփյանցի հուշագրությունը, որը ներկայացնում է հարցի ողջ ողբերգականությունը:¹⁴

Ականատեսների հուշերից նշենք նաև Արտաշես Ալեքսանդրյանի գիրքը:¹⁵ Նա Կարսի անկման ողջ պատասխանատվությունը գցում է զինվորների դասալքության և դրա պատճառ «աշխատավորների գլխին պատուհաս դարձած և հակասովետական մոլուցքով կուրացած դաշնակցական կառավարողների» ու սպայության վրա:¹⁶

Խորհրդահայ պատմագիտության մեծ թուրք-հայկական պատերազմին առանձին աշխատությամբ առաջինն հատուկ անդրադարձել է Սարիբեկ Կարապետյանը:¹⁷ Նա քննվող հարցի հետ կապված բոլոր պարագաները պայմանավորում է Ռուսաստանի կառուցողական դիրքորոշմամբ: Նման մոտեցումից ելնելով՝ նա շեշտում է, որ «դաշնակցականները իմպերիալիստների թիյադրանքով դժբախտաբար հրաժարվեցին Հայկական հարցի լուծման սովետական առաջարկից և ընդունեցին Սևրի պայմանագրի ազգակործան քաղաքականությունը, որի հետևանքով 1920թ. աշնանը հայ ժողովուրդը կանգնեց իսպառ ոչնչացման վտանգի առջև»: Նա դաշնակցականներին մեղադրում էր այն բանում, որ նրանք հայկական հողերը ուզում էին միավորել «ավանտյուրիստական մեթոդներով, իմպերիալիստների «օժանդակությամբ» պատերազմի միջոցով, նույնիսկ սեփական ուժերով»:¹⁸

Ուշագրավ է պատերազմի պատճառների և բնույթի ուսումնասիրումը:¹⁹ Հեղինակն իրավացիորեն նշում է, որ թեև թուրքիայի հարձակման նպատակները խորհրդահայ պատմագիտության կողմից «տարբեր ձևերով շոշափվել են», սակայն այդ հարցն իր «համակողմանի լուծումը չի ստացել», քանզի «բազմակողմանիորեն չեն պարզաբանվել թուրքական զավթիչների դադափարական և արշավի հակասովետական պլանները»: Նա իրավացիորեն շեշտում է սովետական-քեմալական քաղաքականության ժառանգորդությունը և շարունակականությունը: Ուշագրավ է հեղինակի այն միտքը, ըստ որի 1919-1920թթ. քեմալականներն իրենց «ձեռնարկում էին հեղափոխականներ», որոնք

¹³ Մարտկոց, 29.X.1932, էջ 1:

¹⁴ Գարեգին Յովսեփյանց, Կեանքիս ամենադժբախտ օրը և երջանկութեանս ըոպէն, Անթիլիաս, 1982: Տե՛ս նաև՝ Ուրուն չապաւիհնելու արդիւնքը, Ե., 2002:

¹⁵ Ա. Ալեքսանդրյան, Կարս. 1920-21, Ե., 1986:

¹⁶ Նույն տեղում, էջ 25:

¹⁷ Ս. Խ. Կարապետյան, 1920թ. հայ-թուրքական պատերազմը և սովետական Ռուսաստանը, Եր., 1965:

¹⁸ Նույն տեղում, էջ 10:

¹⁹ Ս. Խ. Կարապետյան, նշվ. աշխ., էջ 14-34:

«իրբև թե պայքարում են իմպերիալիզմի դեմ և սովետական կառավարության համակրանքը չարաշահելով, պանթուրքիզմի ու հակասովետական պրոպագանդա էին մղում»:²⁰

Ս. Կարապետյանն այն հիմնավոր կարծիքն է փաստում, որ 1919-1920թթ. Թուրքիան այն չափի նախապատրաստական աշխատանքներ էր տարել, որ արդեն 1920թ. գարնանը պատրաստ էր Հայաստանի վրա հարձակվելուն: Միանշանակ ճիշտ է հեղինակը, որ պատերազմը Թուրքերն են սկսել և առաջինը հարձակվել Հայերի վրա: Նա այդ միտքը հաստատում է նաև Ֆրանսիական աղբյուրներով: Այս հարցի առթիվ նա քննադատում է այն խորհրդային պատմաբաններին, որոնք պատերազմի պատճառ համարում էին դաշնակցականներին: Մասնավորապես, Ա. Միլլերը «Համաշխարհային պատմության» 8-րդ հատորում ձգտում է հաստատել, որ իմպերիալիստները դաշնակցական Հայաստանին դրդեցին պատերազմելու Թուրքիայի դեմ: Ս. Կարապետյանն իրավացիորեն շեշտում է, որ Միլլերն իր պաշտպանության տակ է վերցնում և «կոծկում քեմալականների ոեակցիոն, հայաջինջ քաղաքականությունը»:²¹

Նշենք նաև, որ Թուրքիայում խորհրդային դեսպան Ս. Արալովը ևս նախահարձակ կողմ է համարում Հայաստանին:²² Իսկ արդեն Ա. Խեյֆեցը նախ անհիմն հայտարարում է, թե պատերազմը սկսեցին դաշնակցականները և ապա ինքն իրեն հակասելով հայտարարում, որ «իմպերիալիստների ինտրիգները և դաշնակցների պրոպոկացիոն գործողությունները» ստիպեցին Թուրքերին պատերազմ հայտարարել դաշնակցներին:²³

Այս սխալ տեսակետն առաջ է քաշվել նաև քաղաքացիական կռիվների պատմության մասին բազմահատորյակում, ըստ որի, «դաշնակցները Անտանտի դրդամամբ և օժանդակությամբ զինված ելույթ կազմակերպեցին Թուրքիայի դեմ»:²⁴

Խորհրդային պատմաբանների աշխատանքներից անդրադառնանք նաև Դ. Զավրիևի գրքին: Աշխատության երկրորդ մասում նա ներկայացնում է 1920-1921թթ. Անդրկովկաս Թուրքերի կատարած արշավանքը:²⁵ Հիմնագուրկ է հեղինակի այն տեսակետը, ըստ որի, Թուրքերի հետ պատերազմը «ձեռնառու էր դաշնակցներին, քանզի Հայաստանը այդ ժամանակ ապրում էր ծանր ճգնաժամ, և դաշնակցները փնտրում էին փրկությունը ռազմական արկածախնդրությունների մեջ»: Նա գտնում է, որ «դաշնակ արկածախնդիրների ելքը մեկն էր՝ Արևմուտքի իմպերիալիստների օգնությամբ Թուրքերի դեմ պատերազմ սկսել, իր տարածքը «մաքել» թաթարներից ու քրդերից և ստեղծել «զուտ ազգային» պետություն: Մյուս կողմից, նրա կարծիքով, պատերազմի օգնությամբ Հայաստանի ղեկավարները հույս ունեին ժողովրդին շեղել հասունացող

²⁰ Նույն տեղում, էջ 20:

²¹ Նույն տեղում, էջ 24: Տե՛ս նաև՝ А. Ф. Миллер, Краткая история Турции, М., 1948. Очерки новейшей истории Турции, М., 1983.

²² С. И. Аралов, Воспоминания советского дипломата, М., 1960, с. 27.

²³ А. Н. Хейфец, Советская Россия и сопредельные народы Востока, М., 1964, с. 131.

²⁴ История гражданской войны СССР, т. 5, с. 236.

²⁵ Д. С. Завриев, К новейшей истории северо-восточных вилайетов Турции, Тб., 1947, с. 78-112.

հեղափոխական ճգնաժամից և նրան լարել բոլշևիկների դեմ:²⁶ Նման դիրքորոշմամբ հանդերձ, հեղինակը հետագա էջերում ներկայացնում է քեմալական վարչակարգի դասակարգային էությունը և ազգային քաղաքականությունը՝ հատկապես ուղղված հայ բնակչության դեմ:²⁷ Դ. Ջավրիևի աշխատության դրական կողմը պետք է համարել հայ ժողովրդի կրած ղոհողությունների վիճակագրական տվյալների ներկայացումը:

1920թ. հայ-թուրքական հարաբերությունների թեման քննարկված է նաև Ա. Կադիշևի աշխատությունում:²⁸

Այսպիսով, խորհրդային պատմագիտության մեջ իրենց շեշտված թուրքամետ և միաժամանակ հակագիտական մեթոդներով ու հակահայկական տրամադրվածությամբ առանձնանում են Ա. Միլլերը և Ա. Խեյֆեյը:

Արժանիորեն քննադատելով նրանց տեսակետները՝ Ս. Կարապետյանը միանշանակ շեշտում է. «Հայաստանը պատերազմի պատրաստ չէր: Հայ-թուրքական պատերազմը սկսեց թուրքիան: Նա էր, որ իմպերիալիստների թուլյությունից առաջինը հարձակվեց Հայաստանի վրա»:²⁹ Վերլուծելով պատերազմի բնույթը՝ հեղինակն իրավացիորեն նշում է, որ հայերի դեմ թուրքական արշավանքը պետք է համարել «իմպերիալիստական, զավթողական, անարդարացի»: Իսկ արդեն Հայաստանի կողմից պատերազմը թուրքիայի դեմ պետք է համարել «արդարացի և պաշտպանողական պատերազմ՝ իր երկիրը ներխուժած թալանչիների, նվաճողների, ճնշողների դեմ, իր հողի և հայրենիքի համար»: Պատերազմը դիտարկելով լայն համապատկերում՝ Ս. Կարապետյանն այն համոզմանն է, որ թուրքիայի արշավը դեպի Հայաստան «լուկա երևույթ» չէր, նախապատրաստվել էր թուրքիայի ու իմպերիալիստական պետությունների կողմից և ուներ «չատ հեռուն տանող նպատակներ, իսկ թուրքիայի կողմից Հայաստանի գրավումը միայն մի օղակն էր այն ամբողջ շղթայի, որի նպատակն էր գրավել Անդրկովկասը և այն ռազմական հենակետ դարձնել Հայաստանի դեմ: Նշելով թուրքական զինուժի կրկնակի գերակշռության փաստը՝ 60 հազարն ընդդեմ 30 հազարի, հեղինակը, միաժամանակ, անաչառորեն նշում է հայկական բանակի անհաջողությունների պատճառները. «սպայական կազմի և շարքայինների միջև գաղափարական միաբանության բացակայությունը, սպայության և խմբապետների միջև եղած անհավասարությունը, վերջապես, հրամանատարական կազմի ապիկարությունն ու ռազմական գործին թույլ տիրապետելը»:³⁰

Անդրադառնալով հայկական բանակի ոչ մարտունակությանը, բարոյալքված և դասալիք լինելուն՝ հեղինակը նշում է, որ «ամենամեծ ճամարտությունն այն էր, որ դաշնակները հենց իրենք էին բարոյալքում զինվորներին՝ իրենց տգիտությունից, իրենց հորինած «ուռա-քեմալական», «բոլշևիկ-թուրքական» բռնկների հակասովետական ազիտացիայով: Նրա կարծիքով, հայ զինվորներն այդ ամենից եզրակացնում էին, որ եթե «թուրքերը բոլշևիկների դաշնակիցներն են, ապա չպետք է կռվել թուրքերի դեմ»: Այս տեսանկյունից ուշադրավ է հիշյալ տրամագրությունների սխալ ընկալման և

²⁶ Նույն տեղում, էջ 82-84:

²⁷ Նույն տեղում, էջ 113-164.

²⁸ А. В. Кадишев, Интервенция и гражданская война в Закавказье. М., 1960.

²⁹ Ս. Խ. Կարապետյան, նշվ. աշխ., էջ 26:

³⁰ Նույն տեղում, էջ 30-31:

ներկայացման քննադատությունը: Ըստ Ս. Կարապետյանի, Ալեքսանդրապոլի բոլշևիկյան կազմակերպության ղեկավարները «ճիշտ չհասկացան քեմալականների քաղաքական խարդախությունները, քեմալական շարժման երկդիմությունը, նրա ռեակցիոն-իմպերիալիստական և ազգային-բուրժուական կազմը»: Ավելին, նրանք քեմալական շարժումը «ազատագրական» համարելով՝ քեմալականներին սկսեցին պրոպագանդել որպես «բոլշևիկների դաշնակիցներ, սովետական իշխանության կողմնակիցներ»: Իսկ արդեն «այդ սխալ ագիտացիայի հետևանքով» Ալեքսանդրապոլի գավառի գյուղացիները «աղ ու հացով» էին դիմավորում թուրք ասկյարներին:³¹

Կապված պատերազմի կարգավորման հարցի հետ՝ Ս. Կարապետյանն առանձին ներկայացնում է այն խաղաղ ճանապարհով լուծելու ուղղությունը Ռուսաստանի պայքարը:³² Հեղինակի միանշանակ համոզմամբ, «Հայ ժողովրդին ֆիզիկական ոչնչացումից փրկելու միակ ելքը Սովետական Ռուսաստանից ռազմական օժանդակության պահանջն էր և նրա հետ դաշինքի մեջ մտնելը», ինչը մերժվեց դաշնակիցների կողմից: Ըստ այդմ, նրա կարծիքով, «պատմականորեն անհրաժեշտ դարձավ դաշնակիցների իշխանության տապալումը»: Նրա համոզմամբ, Ռուսաստանը «բոլոր միջոցները» գործադրեց պատերազմը դադարեցնելու և վիճելի հարցերը իր մասնակցությամբ բանակցություններով լուծելու համար: Նա նաև նշում է Բ. Լեգրանի առաքելության վարած «կարևոր» բանակցությունների մասին:³³

Ս. Կարապետյանի աշխատության ուշագրավ մաս պետք է համարել պատերազմի ժամանակ և հետո թուրքերի կատարած ավերածությունների ու դրանց դեմ Սովետական Հայաստանի միջոցառումների և բողոքների մասին, ինչպես նաև Ալեքսանդրապոլի գավառի ազատագրման մանրամասն պատմության շարադրումը:³⁴

Ընդհանուր առմամբ, չնայած համառոտ լինելուն և ոչ խոր վերլուծությունը, Ս. Կարապետյանի ուսումնասիրությունը զգալի քայլ էր քննվող պրոբլեմի լուսաբանման բնագավառում:

Հայ ժողովրդի պատմության բազմահատորյակում այս թեման շաղկապված է ռուս-հայկական բանակցությունների հարցի հետ:³⁵ Այդտեղ միանշանակ նշվում էր, որ քեմալական շարժումն «ընդհանուր առմամբ լինելով հակաիմպերիալիստական, Անդրկովկասում հետապնդում էր նվաճողական նպատակներ»: Բարձր գնահատելով Հայ-թուրքական հարաբերությունների և տարածքային խնդիրների լուծման խնդրում Ռուսաստանի դերը՝ խստությամբ քննադատվում է Հայաստանի ճակատագրի հանդեպ Անտանտի տերությունների որդեգրած դիրքորոշումը, եզրահանգվում է, որ պատերազմում «դաշնակցական կառավարությունը» պարտություն կրեց, որը ապացուցեց նրա քաղաքականության «ամբողջ սնանկությունը»:³⁶

³¹ Նույն տեղում, էջ 31-32:

³² Նույն տեղում, էջ 33-34:

³³ Նույն տեղում, էջ 35-39:

³⁴ Նույն տեղում, էջ 47-56:

³⁵ Հայ ժողովրդի պատմություն, հ. 7, ե., 1967, էջ 95-112:

³⁶ Նույն տեղում, էջ 105:

Ակադեմիկոս Հ. Սիմոնյանն այս հիմնահարցը ներկայացրել է իր երկու հիմնարար աշխատություններում:³⁷ Նա շատ հանգամանալից ներկայացնում և վերլուծում է քեմալական շարժման գաղափարախոսությունը, նրա քաղաքական նկրտումները, տալիս քեմալիզմի իրական և արդարացի գնահատականը: Համոզված ենք, որ նրա աշխատություններն իրենց մեթոդական սկզբունքներով և պատմագիտական խոր վերլուծությամբ թեմայի համալիր պատկերացման ու ընկալման առումներով ուղենիշ կարող են լինել:

Խորհրդային պատմագրության մեջ այս հիմնահարցին անդրադարձել է նաև Էդ. Զոհրաբյանը:³⁸ Նա քննարկել է Ռուսաստանի արևելյան քաղաքականությունը, քեմալական շարժման ընդգծված հակահայկական էությունը, խորհրդային միջնորդության դերակատարման և թուրք-հայկական պատերազմի հարցում Անտանտի տերությունների դիրքորոշման հարցերը³⁹ և հիմնավորված քննադատել թուրք պատմաբանների հակագիտական տեսակետները: Էդ. Զոհրաբյանը նաև ամենայն մանրամասնությամբ ներկայացրել է 1920թ. դեկտեմբերի 2-ի Ալեքսանդրապոլի պայմանագրի ստորագրման ուղղափառ քաղաքական պայմանները, ներքաղաքական-դիվանագիտական կապերի խորքային պարագաները և դրա ունեցած հետևանքները:⁴⁰ Այդ ամենն արվել է արխիվային նոր փաստաթղթերի օգտագործմամբ:

Էդ. Զոհրաբյանի այդ աշխատությունը հայ պատմագիտության մեջ Ալեքսանդրապոլի պայմանագրի վերաբերյալ լավագույն վերլուծություններից մեկն է, որը, չնայած խորհրդային մեթոդոլոգիական դիրքորոշմանը, համակողմանիորեն հաջողված աշխատանք է:

Հետագայում նա այս թեմային անդրադարձավ հատուկ աշխատություններով⁴¹, որը նախօրոք հրատարակվել էր մամուլում:⁴² Եթե նախկինում նա օգտագործում էր «Հայ-թուրքական պատերազմ» ձևակերպումը, ինչը սխալմամբ արմատավորվել է պատմագիտության մեջ, ապա այս աշխատությունում իրավամբ արդեն շրջանառության մեջ է դնում «Թուրք-հայկական պատերազմ» արտահայտությունը: Էդ. Զոհրաբյանը թեման ներկայացնում է համակարգված, անդրադառնում գրեթե բոլոր հարցերին և ձգտում դրանց տալ բավականին սպառիչ գնահատականներ ու պատասխաններ: Պատերազմի «ճշմարտացի ուսումնասիրությունը, մեր ժողովրդի կրած պարտության պատճառների վերհանումը» դիտարկելով արդիական դիրքերից՝ նա եզրակացնում է, որ այդ ամենն «օգի ու ջրի պես պետք է կրկին անկախության դրոշակ պարզած մեր ժողովրդին»:⁴³ Քննելով քեմալական շարժման ակտիվացման միտումները՝ նա նշում է դրա հակահայկական ուղղվածությունը, «անթաքույց թշնամանքն ու ատելությունը Հայաստանի

³⁷ Հ. Ս. Սիմոնյան, Թուրք ազգային բուրժուազիայի գաղափարախոսությունը և քաղաքականությունը, Ե., 1986, նույնի՝ Թուրք-հայկական հարաբերությունների պատմությունից, Ե., 1991:

³⁸ Է. Ա. Զոհրաբյան, Սովետական Ռուսաստանը և Հայ-թուրքական հարաբերությունները, Ե., 1979:

³⁹ Նույն տեղում, էջ 12-91:

⁴⁰ Նույն տեղում, էջ 92-171:

⁴¹ Է. Ա. Զոհրաբյան, 1920թ. Թուրք-հայկական պատերազմը և տերությունները, Ե., 1997:

⁴² Երեկոյան Երևան, 1990, հոկտեմբեր-1991-փետրվար:

⁴³ Է. Ա. Զոհրաբյան, 1920թ. Թուրք-հայկական պատերազմը և տերությունները, էջ 8:

նկատմամբ», ներկայացնում Հայաստանի դեմ քեմալական-մուսավաթական համագործակցությունը: Պետք է համաձայնվել նրա այն դիտողություն հետ, որ «Թե՛ Թուրք քեմալականները, Թե՛ աղերի բոլշևիկները Հայաստանի հարցում միևնույն քաղաքական որդեգրումն ունեին, որ ժառանգել էին իրենց նախորդներից, երիտթուրքերից ու մուսավաթականներից: Դա անհապաղ նրա վրա հարձակումը, նրա տարածքների զավթումը և որպես պետություն նրա ոչնչացումն էր»:⁴⁴ Հեղինակը Մ. Քեմալի խոստովանություններով փաստարկում է, որ 1920թ. ամռանը Հայաստանի վրա ծրագրված Թուրքական արշավանքը կանխվեց Ռուսաստանի դիրքորոշման պատճառով: Այն թեպետ կանխեց, բայց «ամբողջովին չվերացրեց հայ ժողովրդին սպառնացող աղետը», քանզի քեմալականներն արշավը «կանգնեցրեցին այն հետո վերսկսելու» նպատակով:⁴⁵

Դիտարկելով պատմագիտության մեջ որոշ չափով ամրապնդված այն կարծիքը, ըստ որի, եթե խնդիրը դիվանագիտական ճանապարհով լուծվեր 1920թ. ամռանը, ապա որոշ արևմտահայ տարածքներ կմիանային Հայաստանի Հանրապետությանը, էդ. Ջոհրաբյանն իրավացիորեն շեշտում է, որ ժամանակի պայմաններում «քեմալական հայատյացներին զսպել կարող էր միայն ուժը, ռեալ ուժը, միմիայն ռեալ ուժի առկայությունը կարող էր նրանց հարկադրել ճանաչելու կենսունակ Հայաստանի գոյությունը և համաձայնելու նստել բանակցությունների սեղանի շուրջ՝ սահմանների արդարացի լուծման համար»: Այնինչ, հեղինակի դիպուկ գնահատմամբ, «Հայաստանը Թուրքերին հարկադրելու չափ ուժ չունեի, իսկ Անտանտի դաշնակիցներն էլ նրա համար ոչ մի զինվոր զոհարեցրելու պատրաստակամություն չէին ցուցաբերում, ինչը հրաշալիորեն հասկացել էին քեմալականները, բայց ոչ՝ Հայաստանի ղեկավարները»:⁴⁶

Թեմային առնչվող ռազմաքաղաքական և դիվանագիտական հարցերի վերլուծումը էգ. Ջոհրաբյանը կատարել է համոզիչ պատմագիտական և մեթոդական սկզբունքներով: Պատերազմին նախորդած դիվանագիտական կարևոր իրադարձություններից էր Լ.Շանթի պատվիրակության միսիան Մոսկվա և 1920թ. ամռանը Ռուսաստանի պատվիրակության հետ նրա ունեցած բանակցությունները: էգ. Ջոհրաբյանը շատ հանգամանալից ներկայացնում և խորությամբ վերլուծում է այդ հարցը:⁴⁷ Ներկայացնելով կողմերի հետապնդած նպատակները և դիրքորոշումները՝ հեղինակն արդարացիորեն քննադատում և մերժում է հայ պատմագիտության մեջ «քաղաքացիության իրավունք ստացած» այն տեսակետը, համաձայն որի, Մոսկվայի բանակցությունները ձախողվել են բացառապես Շանթի պատվիրակության անհաշտ դիրքի պատճառով գտնելով որ այն «չի համապատասխանում իրականությանը»: Միաժամանակ, նա օբյեկտիվորեն քննադատում է Լ.Շանթի դիվանագետի գործելակերպը, որն օժտված չէր «իրադրությունը ճիշտ գնահատելու և արագ կողմնորոշվելու ունակությամբ, ճկունությամբ, սառը դատողությամբ և սթափ հաշվարկով»: Ըստ այդմ, նա կարծում է, որ հանրապետության կառավարությունը կամ սխալվել էր Շանթին նշանակելով կամ էլ սկզբից նրան այդ ուղղությամբ էր հրահանգել, այսինքն, կառավարությունն Արևմտահայաստանի մասին բանակ-

⁴⁴ Նույն տեղում, էջ 23-28:

⁴⁵ Նույն տեղում, էջ 40-42:

⁴⁶ Նույն տեղում, էջ 43-46:

⁴⁷ Նույն տեղում, էջ 47-77:

ցովթյուններ վարելու լիազորություն նրան չէր տվել: Այսուհանդերձ, էդ. Ջոհրաբյանը դժվարանում է կառավարությունը նման դիրքորոշման համար մեղադրել՝ «հատկապես նկատի առնելով ստորագրվելիք Սևրի պայմանագիրը»: Նա գտնում է, որ հայկական հարցի լուծման գործում «ամբողջովին դեպի Արևմուտք կողմնորոշվելը և Ռուսաստանին հաշվից դուրս գցելը, անկասկած, սխալ կլիներ, մանավանդ որ Ադրբեջանի խորհրդայնացումից և այնտեղ 11-րդ Կարմիր բանակի կենտրոնացումից հետո նա դարձել էր տարածաշրջանի ամենազդեցիկ ուժը»: Անդրադառնալով հարցի պատմագրությունը՝ էդ. Ջոհրաբյանը ճիշտ է նշում, որ խորհրդային պատմաբաններն անխտիր, ինչպես նաև սփյուռքահայ որոշ ուսումնասիրողներ, անվերապահորեն պնդում են և այն էլ՝ «առանց լրջորեն հիմնավորված փաստարկների», թե բանակցությունների ձախողման ու հայ-ռուսական պայմանագիրը չստորագրելու համար մեղավոր են միմիայն Հայաստանի Հանրապետության կառավարությունը և Շանթի պատվիրակությունը, որ եթե նրանք որոշ զիջումներ անեին և ընդունեին Ռուսաստանի միջնորդությունը, ապա Հայաստանը կներառեր Կարսը, Սարղիզամիշը, Արդահանը, և արևմտահայ որոշ նահանգներ: Մյուս կողմից, նա տեղին քննադատում է Հ.Օհանջանյանի կառավարությունը, որը «զուրկ էր իրատեսությունից, տարված իլյուզիաներով, չէր փորձում հավասարակշռված քաղաքականություն վարել, անվերապահորեն անձնատուր էր եղել Արևմուտքին»:⁴⁸

Հեղինակը կարևոր նշանակություն է տալիս թուրք-հայկական պատերազմի դիվանագիտական նախապատրաստության վերլուծմանը: Նա հանգամանալից ներկայացնում է Բ.Լեգրանի միսիայի գործունեությունը, և այդ համատեքստում Ռուսաստանի դիրքորոշումը: Հետաքրքիր է Ս.Օրջոնիկիձեի գործելակերպի, ադրբեջանամետ կեցվածքի և ընդդեմ Հայաստանի արտա-հայտվելու նրա գծի միանգամայն նորոպի ներկայացումը:⁴⁹

Ուշագրավ պետք է համարել Հայ բոլշևիկների դիրքորոշման քննադատությունը, քանզի վերջիններս անվերապահորեն բռնել էին Ադրբեջանի կողմը: Այդ հանգամանքը հեղինակը բացատրում է նրանով, որ նրանք կենտրոնացել ու գործում էին Բաքվում և «հետևապես, կամա թե ակամա պետք է կրեին Նարիմանովի և նրա խմբի ազդեցությունը, դառնային նրա կամա-կատարը»: Հայաստանի խորհրդայնացումը նրանք համարում էին իրենց «կյանքի նպատակը, գերխնդիրը», իսկ հայ-ռուսական հարաբերությունների կարգավորումը սպասվող պատերազմի նախօրեին անորոշ ժամանակով «հեռացնում էր Հայաստանի խորհրդայնացումը և երկարաձգում դաշնակցության տիրապետությունը»: Սրանից զատ, նրանց մեծ մասը «Հայաստանյան ծագում» չունեին, նրանց քիչ էին հասկանալի Հայ մարդու մտածելակերպը, ձգտումները, ազգային խնդիրները: Այսինքն, էդ. Ջոհրաբյանի եզրակացությունը. «Այստեղից էլ նրանց քամահրանքը և անպատասխանատու վերաբերմունքը հողային-տարածքային հարցերի նկատմամբ»: Միաժամանակ, պետք է համաձայնվել հեղինակի այն մտքին, որ նման մտածելակերպը հատկանշական չէր բոլոր Հայ կոմունիստներին:⁵⁰

Հեղինակի ուշադրության կենտրոնում է եղել նաև 1920թ. ամռան վերջին Թիֆլիսում ընթացած հայ-ռուսական բանակցությունների հարցը, որոնց

⁴⁸ Նույն տեղում, էջ 57-61:

⁴⁹ Նույն տեղում, էջ 103-106:

⁵⁰ Նույն տեղում, էջ 110-112:

արդյունքը օգոստոսի 10-ին կնքված համաձայնագիրն էր: Ընդունելի է նրա այն կարծիքը, որ այդ համաձայնագիրը հանրապետության համար դիվանագիտական հաջողություն համարել չի կարելի, քանզի չգոհացրեց ոչ միայն Հայաստանին, այլև մյուսներին: Էդ.Ջոհրաբյանը ներկայացրել է նաև 1920թ. ամռանը Մոսկվայում կայացած ռուս-թուրքական բանակցությունները, Հայաստանի հանդեպ Բեքիր Սամի բեյի որդեգրած անհաշտ դիրքորոշումը, ինչն անմիջականորեն շարժեցրեց և է Թուրք-Հայկական պատերազմի «լինելը» վճռի կայացման հետ:⁵¹

Աշխատության երկրորդ մասի առաջին դիստում էդ.Ջոհրաբյանը անդրադառնում է Թուրք-Հայկական պատերազմի սեպտեմբեր-հոկտեմբեր փուլին և այդ կապակցությամբ Անտանտի տերությունների դիրքորոշմանը: Նկատի ունենալով պատերազմը սկսվելու վերաբերյալ սկզբնազգայունների հաղորդած տարբեր տվյալները և պատմագիտության մեջ առկա մի քանի ժամկետները՝ հեղինակը համեմատական վերլուծություն է ապացուցում է սեպտեմբերի 23-ի 1919 թ. 24-ի տարբերակը:⁵²

Կարևոր պետք է համարել երկու կողմերի գինուժերի հարաբերակցության քննարկումը: Այդ հարցի մասին ևս պատմագիտության մեջ եղած կարծիքները միանշանակ չեն:⁵³ Հեղինակը մանրամասն ներկայացրել է կովող կողմերի զորքերի քանակների ու կազմի տարբեր տվյալները և համոզված ապացուցել Թուրքական կողմի գերակշռությունը՝ քանակական առումով: Պետք է համաձայնվել հեղինակի այն մտքի հետ, որ «Հայկական հրամանատարությունը ռեալ պատկերացում չունի» Թուրքական ուժերի մասին, նույնիսկ չգիտեր, «Թե ինչ է կատարվում սահմանից այն կողմ»:⁵⁴ Էդ.Ջոհրաբյանը քննադատում է գրականության մեջ հաճախ հանդիպող այն միտքը, որ Հայկական բանակը քանակով և զենքով գերազանցել է Թուրքերին: Մինչդեռ, փաստ է, որ քեմալական բանակն «ամեն տեսակետներին» գերազանցել է Հայկականին:

Հեղինակը, տարբեր փաստեր շրջանառության մեջ դնելով, եզրահանգում է, որ ԱՄՆ-ը և եվրոպական երկրները «ոչ թե չէին կարող, այլ չէին ցանկանում» օգնել Հայաստանին: Քննադատության սուր սլաքը նա ուղղում է հատկապես Անգլիայի և Ֆրանսիայի դեմ: Ինչ վերաբերում է Ռուսաստանի դիրքորոշմանը, ապա հեղինակի համոզմամբ, նրան «ավելի շատ հետաքրքրում էր Արևմուտքի հետ քեմալականների որևէ մերձեցում Թուրք չտալու, Հայաստանի տարածքով դեպի Թուրքիա տրանզիտի իրավունք ստանալու և Հայաստանին Անտանտից կտրելու հարցը»: Մյուս կողմից, ուշագրավ և լրիվ ընդունելի է Էդ.Ջոհրաբյանի այն տեսակետը, որ հոկտեմբերին քեմալականներն արդեն համոզվել էին, որ «Անտանտը ոչ միայն չի միջամտի և որևէ տեղում դեսանտ ափ չի հանի, այլև Հայտնի չափով նաև կխրախուսի Թուրքական առաջխաղացումը՝ հույս ունենալով, որ, ի վերջո, դա կհանգեցնի Թուրք-խորհրդային ընդհարմանը»:⁵⁵

Քննադատելով արտաքին ուժերի ունեցած բացասական դիրքորոշումը՝ հեղինակը միաժամանակ արդարացի քննադատում է նաև Հ.Օհանջանյանի կառավարության վարած արտաքին քաղաքականությունը, որը նրա կարծիքով, «առանձնապես ճկուն ու հեռատես չի եղել և չի կարողացել հանրապետության դեկն այնպես վարել, որ նրան հետու պահեր նորանոր աղետներից ու

⁵¹ Նույն տեղում, էջ 120-149:

⁵² Նույն տեղում, էջ 160-166:

⁵³ Նույն տեղում, էջ 166-172:

⁵⁴ Նույն տեղում, էջ 173:

⁵⁵ Նույն տեղում, էջ 204, 206, 209-210:

ողբերգություններից», իսկ Հանրապետության կառավարությունը «ոչ միայն չկանխատեսեց վտանգը, այլև լուրջ նշանակություն չտվեց քեմալական շարժմանը»: Այս առթիվ Հեղինակը մանրամասն ներկայացնում է Բ.Լեզրանի և Լ.Շանթի պատվիրակությունների՝ Երևանում կայացած բանակցությունները, տալիս 1920թ. հոկտեմբերի 28-ի համաձայնագրի նախագծի վերլուծությունը:⁵⁶

Աշխատությունում հանգամանալից ներկայացվում են պատերազմի ավարտական փուլը և Հայաստանի դիվանագիտական ու ռազմական պարտության բոլոր պարագաները⁵⁷. Այստեղ ևս նա հիմնական ուշադրությունը դարձնում է վիճահարույց խնդիրների պարզաբանմանը և վերլուծմանը: Նման հարցերից է Կարսը առանց կռվի հանձնելու գործոնը: Անդրադառնալով եղած տեսակետներին՝ էդ. Ջոհրաբյանը միանգամայն համոզված չեղտում է, որ «պետք է խոսել ոչ թե չկովելու, այլ վատ, անկազմակերպ կռվելու մասին, որի մեղքը, հասկանալի է, ոչ թե զինվորներին էր, այլ հրամանատարությանը»⁵⁸. Հարկ է նշել, որ Հեղինակի այս կարծիքն անվերապահորեն և միանշանակ չի կարելի ընդունել: Էդ. Ջոհրաբյանը հայկական բանակի պարտության գործում բոլշևիկյան պրոպագանդի առթիվ գտնում է, որ այն վճռական դեր չէր կարող խաղալ⁵⁹: Նա ներկայացնում է Կարսի անկման և պատերազմում Հանրապետության պարտության հետևյալ պատճառները. թուրքական զորքերի քանակական, բարոյահոգեբանական, մարտական պատրաստվածության և կռիվածության մակարդակի գերազանցությունը հայկականի համեմատ, հրամանատարության՝ իր բարձրության վրա չգտնվելը, մարտիկների ցածր հայրենասիրական և բարոյահոգեբանական դաստիարակությունը, նրանց և տեղական իշխանությունների անբարյացակամ հարաբերությունները, վատ հետախուզությունը⁶⁰:

Հեղինակը հանգամանալից վերլուծում է նաև թուրքերի՝ Արարատյան դաշտ չնեղխուժելու պատճառները: Նա գտնում է, որ քեմալականները քաջ գիտակցում էին, որ Հայկական հարցը, այնուամենայնիվ, միջազգային հարց է, և որ Հայաստանի հարցում նրանք չէին կարող հաշվի չնստել նաև խորհրդային կառավարության դիրքորոշման հետ⁶¹:

Ամփոփելով նշենք, որ էդ. Ջոհրաբյանի այս աշխատությունն իրոք թուրք-հայկական պատերազմի մասին հայ պատմագիտության ամենից համակարգված և միանգամայն հաջողված աշխատանքներից է:

Աներկբայորեն, թուրք-հայկական պատերազմի պատմությունն ու նրա դասերն ուսանելի և կարևոր են ոչ միայն պատմագիտական, այլև արդի քաղաքական իրավիճակի անաչառ գնահատման տեսանկյունից: Գաղտնիք չէ, որ պատմությունը շատ հաճախ սիրում է կրկնվել: Ջարմանալի է, սակայն, որ թուրք-հայկական պատերազմի պատմությունը ցավալիորեն մինչև վերջերս ընդհանրացված և խոր ուսումնասիրության չի ենթարկվել՝ չհաշված առանձին բացառությունները: Այս պարագան հայ պատմագիտության նկատելի բացթողումներից էր: Մինչդեռ, այդ պատերազմի պատմության հետազոտությունը, նկատի ունենալով դրա կարևորությունն ու նշանակությունը,

⁵⁶ Նույն տեղում, էջ 216-239:

⁵⁷ Նույն տեղում, էջ 242-355:

⁵⁸ Նույն տեղում, էջ 263-266:

⁵⁹ Նույն տեղում, էջ 270:

⁶⁰ Նույն տեղում, էջ 271-72, 347-55:

⁶¹ Նույն տեղում, էջ 328-334:

անհրաժեշտաբար պետք է ուսումնասիրողների ուշադրության առարկաներից մեկը լինեն:

Կրկին նշենք, որ քեմալական շարժումը, որպես կանոն, դիտվում էր մինչև վերջ Հեղափոխական, ազատագրական պայքար՝ ստվերում թողնելով նրա ունակցիոն ուղղվածության վերհանումը: Ինչպես այս, այնպես էլ մյուս բոլոր Հարցերին անհրաժեշտ է տալ պատշաճ պատմագիտական և քաղաքական գնահատականներ, Հատկապես քեմալական շարժման պանթուրքական Հայատյաց դիրքորոշման լուսաբանման առումով:

ПРОБЛЕМЫ ТУРЕЦКО-АРМЯНСКОЙ ВОЙНЫ 1920 ГОДА В АРМЯНСКОЙ ИСТОРИОГРАФИИ

С.М.КАРЯН

Р е з ю м е

Армяно-турецкие взаимоотношения в 1919-1920 годах формировались под воздействием противоречивых военно-политических и дипломатических процессов.

Важнейшими факторами, воздействовавшими на развитие этих взаимоотношений, были: империалистические намерения кемалистского движения, наличие исторических, этнических и особенно территориальных разногласий между ними.

Турецко-армянская война 1920 года одна из трагических страниц в истории армянского народа. Этот вопрос заинтересовал исследователей уже сразу по окончании войны. Имеются многочисленные воспоминания и мемуарные работы как армянских, так и турецких авторов.

Проблема истории турецко-армянской войны в той или иной степени была освещена турецкими политическими деятелями и историками. Вопрос был исследован советскими историками в основном очень конъюнктурно и в ярко выраженном протурецком контексте.

Эта проблема была досконально исследована в армянской исторической литературе за последние годы. Кроме историографического, она имеет также важное политическое значение.